

Snaga i priče žena

Povodom Dana žena, koji se obilježava 8. marta, trebamo istaknuti koliko su žene važne za društvo. One su graditeljke zajednica, nositeljke promjena i pokretačice napretka. Ipak, uprkos njihovom neizmjernom doprinosu, i dalje postoje situacije u kojima su im prava uskraćena ili umanjena.

Postoje žene čije su tihe borbe oblikovale moj svijet, a da to možda nikada nisu ni tražile. One su majke, kćerke, sestre, prijateljice – ali i liderke, naučnice, umjetnice, borci za pravdu. Svaka žena nosi priču u sebi – priču o pobjedi, gubitku, hrabrosti i snovima koje niko ne može da joj oduzme.

Biti žena znači svakodnevno prevazilaziti prepreke koje svijet postavlja i istovremeno graditi mostove za one koje dolaze poslije nas. Mnoge žene su morale da se bore da bi bile ono što jesu, a njihova snaga ostaje zapisana u našim životima, kao neizbrisiv trag. Njihova borba nije bila uzaludna, jer su upravo one stvorile temelje na kojima danas stojimo.

Dan žena nije samo datum u kalendaru, već podsjećanje na svaku ženu koja je morala da se izbori za svoje mjesto u društvu. To je prilika da slavimo njihovu upornost, ljubav i neizmjernu snagu. Slavimo Marie Curie, koja je otvorila vrata nauke za buduće generacije žena, Malalu Yousafzai, koja se izborila za pravo djevojčica na obrazovanje, Rosu Parks, koja je hrabro ustala protiv nepravde – i sve one nepoznate heroine koje su svakodnevno mijenjale svijet.

Pričam ovu priču ne samo zbog sebe, već i zbog svih onih žena koje su mi pomogle da je napišem – svjesno ili nesvjesno. One su mi dale inspiraciju i podstrek da vjerujem u snagu žene. Njihove riječi, djela i snovi postali su dio mog identiteta, pokazavši mi da je moguće ići naprijed, ma koliko put bio težak.

Naučila sam da se glas žene ne mjeri jačinom, već snagom onoga što ostavlja iza sebe. Svaka borba, svaki trud i svaki ostvareni san su kamen temeljac na kojem se gradi bolji svijet.

Žena nije samo nečija majka, kćerka, sestra ili supruga – ona je stub društva, nosilac promjena i graditeljka budućnosti. Zato nikada ne smijemo dozvoliti da njen glas bude utišan, njeni snovi ugušeni, a njena prava osporena. Jer kada jedna žena ustane, svi se podižemo s njom. Neka nas ovaj Dan žena podsjeti na snagu, hrabrost i nepokolebljivu volju svih žena koje su nam pokazale šta znači boriti se – i pobijediti.

Ajla Memović, I a

